

四庫全書

集部

欽定四庫全書

石倉歷代詩選卷一百四十三

明 曹學佺 編

宋詩二十

鄭俠

贈雲門居士

雲門山口雲徘徊居士道與山崔嵬清時肥遯古亦有
驚猿怨鶴今誰偕居士高卧白雲堆山門時為猿鶴開

溪花野草自春色雲芝石笋寧須栽
軟蒸抱石傾新醕麋鹿慣我還無猜
寧知玉署思賢切御手調羹待客來

江亭與程瞿二君邂逅小飲太守送酒因成

蒼翠擎天江上山淙琤瀉玉亭前水邂逅相逢坐上人
傾蓋論心何俊偉涼風颯颯來几筵似與清談相表裏
程瞿軒軒古遺義憫我羈窮見辭氣以為此時無一杯
直恐江山解相鄙旋呼奴僮滌鐺勺雅興悠悠殊未已
逡巡長呵下雲際傳以報謁迂千騎薄聞江許清飲歡

歸去瓊漿遽來賜大哉何公古循吏易俗移風有深致
人之所背公所趨敦薄醇醪為已事連英二城接疆理
舊績新庸滿人耳道塗賡載盡歡謠冠佩清言有餘美

紀連守植道傍木

道傍木夾道參參如合屋種之毫末成合抱太守慈仁
輔生育古來善政益有數道路開通亦其目何為左右
夾萬柯化此長龍被崖谷由吾太守愛民深憂茲嶺外
炎暑酷黃茅鬱蒸之烈氣重嵐固結之濃毒不得清陰

縈且紆何處憩息而躑躅令如源泉下斯行長原太山
秀可掬後人愛惜勿翦拜膏雨每過添新綠

示廬山寺老勝師

離鄉十九年日有如年久歸來山水亦依然人物存亡
半非舊廬阜之前我舅宅此寺如我東西家每來舅家
必到此粵自齒稚今疎牙庾嶺閩山四千里青衫謫逐
自我始築臺東望幾悽涼親故滿前爭不喜林下相逢
真實人執手忘言行處親還家一百二十日五回松下

問禪因師住無住我非動來不須迎去不送大千沙界等
閒看尋常只把毫端弄

苞苴行

苞苴來苞苴去封書裹信不得住君不見箕山之下有
仁人室不杯器以手捧水不願風瓢掛高樹

和孟堅二月晦同出城

城中未免悶出郭喜還生濃淡山原氣高低溪澗聲鳴
棊振幽谷把酒聽流鶯踈曠還隨分何須學步兵

和叔粲滄浪亭

高亭殖殖水泠泠
笑指鷗鳧坐晚汀
遠不聞聲千櫓去
矯如爭秀數峯青
煙雲窗牖紛紛雨
露月蒹葭點點星
最好歸輿擁雙壁
笙歌燈火照仙屏

題仁王寺橫山樓

案俯橫山跨海來
拂雲高閣為誰開
荒谿古木閒猿洞
明月白沙空釣臺
曉日東峯龍天矯
秋風西峽鳳徘徊
居然靜卧江南岸
天塹波濤亦壯哉

次張子京遊天王湖作

湖上遲遲不忍還
談玄清徹幾重關
旋嵐野馬皆歸淨
逝鳥潛魚各自閒
墜果露巢秋後樹
淡煙斜日晚來山
吟情到此何終極
注目紅雲紫霧間

同子忠上西樓

偶因送客上西樓
共愛佳城枕海陬
雁翅人家千巷陌
犬牙商舶數汀洲
風吹細雨兼秋淨
雲漏疎星帶水流
獨有單親頭早白
迢迢東望不勝愁

次張漢公言懷

人間擾擾竟何營，只為蠅頭利與名。
千里瘴鄉吾逐客，一簞窮巷子書生。
文章相誤終須別，寵辱無關自不驚。
贏得白頭閒處坐，一竿風月有誰爭。

幽居

蕭條深巷寄門牆，城郭村居事異常。
石展地衣三藥徑，錦圍天柱十花檣。
幽禽隔樹鈎膠語，異草搖風合和香。
不覺冬歸與春到，但知無事日偏長。

次韻清溪樊主簿

欲致皇恩泱羽鱗天涯地角盡如春當年欸欸曾忘死
今日區區肯患貧正以庭闈安梓里誰知魂夢達楓宸
海邦一見如疇昔心膂相知亦宿因

次韻余純臣通判球琅軒

聳翠凌空不少盤回環使宅對千巒高華誰為球琅闢
勁節相憐霜雪寒引得鳳來緣有實化為龍去始堪看
桐廬寂寞煙雲暝惆悵無人近釣竿

示潮州妹子

八人兄弟三人在獨立他州信汝賢直使無情如槁木
忍看垂淚念南遷從今依舊歌泉水何物偏宜寄謫仙
美酒年年須百甕好從南海便乘船

附王安國詩

平居

締綰散薰風平居觸事慵古今饒得失義命孰違從水
鳥迎秋舫山花映夕春故鄉圖畫見生死愧塵容

池上春日

一池春水綠于苔
水上花枝間竹開
芳草有時依舊長
文禽無事等閒來
年顏近老空多感
風雅含情愧不才
獨有前人脩楔在
荒亭終日此徘徊

春陰

似雨非晴意思深
宿醒牽率卧春陰
苦憐燕子寒相並
生怕梨花晚不禁
薄薄簾帷欺欲透
遙遙歌管壓來沈
北園南陌狂無數
祇有芳菲會此心

假寐

計較平生分閉關偶然容得近人寰
春風池沼魚兒戲暮雨樓臺燕子閒
假寐塵侵黃卷上行吟花墜綠苔間
了無一事撩方寸自是顏齡合鬢斑

苦熱

出門無路避飛沙長夏那堪暑氣加
永晝火雲空爍石華堂冰水未沈瓜
月明葱嶺千秋雪風靜天河八月槎
終借羽翰乘興往煩冤誰此戀生涯

繚垣

繚垣烏鵲近人飛
簾外曛曛日上遲
檜作寒聲風過夜
梅含春意雪殘時
古今無物為真樂
出處何心更詭隨
寄語年華聊一笑
未應長負醉鄉期

遊廬山宿棲賢寺

古屋蕭蕭卧不周
披裘起坐興綢繆
千山月午乾坤晝
一壑泉鳴風雨秋
跡入塵中慚有累
心期物外欲何求
明朝松路須惆悵
忍更無詩向此求

杭州呈勝之

遊觀須知此地佳，紛紛人物敵京華。
林巒鵬雪千家水，城郭春風二月花。
彩舫笙歌吹落日，畫樓燈燭映殘霞。
如君援筆宜摹寫，付與塵埃北客誇。

金明池

霓旌遠遠拂樓船，滿地春風錦繡筵。
三島路深浮閬苑，九霞觴滿奏鈞天。
仗歸金闕浮雲外，人望池臺落日邊。
最引平生江海趣，波瀾一段草如煙。

贈三靈程道人

三靈山下新安水瀟灑人間畫不如收得市朝忙日月
歸來田里老樵漁君能知命忘機久我愧干時觸事踈
從此卜鄰同笑傲何須強著解嘲書

和魏道輔雨中見示

移病憚憚久雨中鳴騶時聽六街東忽吟佳客詩消暑
遠勝前人檄愈風海運我殊慚斥鷃陸沈君合伴翔鴻
更酬珠玉思談笑裹飯何須厭屢空

雨意

柱礎霑霑雨意成
翩翩鳥雀隔簾鳴
侵尋爽氣來欹枕
想像滄波去濯纓
已識古今無得喪
祇須彼我不將迎
踈然一笑呼歸騎
聊更飛毫戲友生

黃梅花

庾嶺開時媚雪霜
梁園春色占中央
未容鶯過毛無類
已覺蜂歸蠟有香
弄月似浮金屑水
飄風如舞麴塵場
何人剝著栽培力
太液池邊想菊裳

送李子儀知明州

兒童劇戲甬東天一別侵尋二十年
海岸樓臺青嶂外
人家簫鼓白鷗邊
哀容愁問州民事
勝槩欣逢太守賢
為我剝題瀟灑句
遙聞鳳沼待詩仙

石倉歷代詩選卷一百四十三

欽定四庫全書

石倉歷代詩選卷一百四十四

明 曹學佺 編

宋詩二十一

曾鞏

宿尊勝院

朝寒陟山砧
宵雨集僧堂
敝衣蓋苦短
客卧夢不長
雄風樹間吼
枯槁簸欲僵
向來雪雲端
葉下百仞隍
起攀

蒼厓望正受萬慮戕歲運忽當爾我顏安得芳傳聞羨
門仙飛身憩蒼蒼誰能乞其靈相與超八方

苦雨

霧圍南山鬱冥冥狹谷荒風驅水聲祗疑日失黃道去
又見雨含滄海生如催病骨夜寒入似送客心衰思驚
揚州青銅不忍照應有白鬢添數莖

南軒

林端青崖軒慘淡寒日暮鳴鳩已安巢飛鵲尚求樹物

情限與奪茲理奚以據諒知巧者勞豈得違所賦久無
胸中憂頗識書上趣聖賢雖山丘相望心或庶

歎嗟

夜歎不為締綵單晝嗟不為徽厥少天弓不肯射妖星
攬搶久已纏朱鳥徐揚復憂羽蟲孽襄漢正病昭回杳
誰為肉食不知憂更看北極羣陰繞

山檻小飲

變秋長雲豪灑雨北風壯餘燭尚爭威積晦頗異狀山

回攢楓顛屋立懸欹上飲檻聚石為歌筵注溪嘗歡言
久誼譁罷興一惆悵旅人正飄飄豈得諧放蕩

上翁嶺

放車秋厓望所得過舊聞初凝古軸畫山水秋毫分時
見厓下雨多從衣上雲八荒正搖落獨餘草木薰但覺
耳目勝未知筋力勤顛毛已種種世患方紛紛何當嘯
吟此日與樵蘇羣

寄舍弟

新霖洗窮臘東南始知寒驚我千里意覺汝征途難空
江挂風席扁舟與誰安羈旅費亦久橐衣豈無單我意
生惻惻為之却朝餐人生飄零內何處懷抱寬已期採
芝藥握手青霞端無令及門喜淹留雪霜殘

寫懷

荒城絕所之歲暮浩多思病眼對湖江孤吟寄天地用
心長者間已與兒女異況排千年非獨抱六經意終非
常情度豈補當世治幽懷但自信往事徒空議天昏繁

霜多節老寒日駛局促去朋友咄嗒牽夢寐論道欲忘
筌豈必在文字

靖安幽谷亭

橫江捨輕楫對面見青山行盡車馬塵豁見水石寰地
氣方以潔崖聲落潺潺誰為千家縣正在清華間風煙
凜人心世慮自可刪況無訟訴囂得有觴詠閒常疑此
中吏白首豈思還

江湖

江湖俗畏遠幽好自相宜
論迹異驚衆辭囂如避時
優遊可以學薇蕨易為私
胡然弃回擢霜雪有驅馳

上人

金節橫光馬珂闌瑞鶻宮
袍腰玉繞煙沙輾轆高軒過
路上千人瞻羽纛瑤魁精彩浮
蒼龍江城四面生春風
城中壞屋籤碧有客苦吟連
旦夕麻衣塵暗抱書泣
歲暮黃梁不供食白日瞳矐望
龍坂坐上一言寒口暖
西入天闡灑霖雨須惜窮鱗在
泥土

送陳商學士

柳黃半出年將破
溪溜浸苔強萬箇
溪頭蒲葦各萌芽
山梅最繁花已墮
物色撩人思易狂
沉躋別館清何那
城東日晚公將去
纛影未離愁四座
公于萬事不彫鐫
心意恢恢無坎坷
來從奎壁光銍下
笑倚樽筵成郡課
嗟余齷齪才性下
棄置合守丘樊餓
公持姓名動人主
袞飾寧嫌筆端挫
從今清夜思江路
夢送公船先北過

送僧晚容

飛光無停芳歲闌羣陽不行寒氣動疎篁有韻窓含雪
重幕無溫筆棲凍蕭條山草葉始枯綽約江梅藥先弄
無人為我取酒斟有客來前乞詩送多情為客不能已
捲紙連書筆鋒縱七言百字拙且卑俗眼方憎汝休重

遊瑯琊山

飛光洗積雪南山露崔嵬長淮水未綠深塢花已開遠
聞山中泉隱若水谷摧初誰愛蒼翠排空結樓臺轍轍
架梁棟輝輝刻瓊瑰先生鸞鳳姿未免燕雀猜飛鳴失

其所徘徊此山隈萬事于人身九州一浮埃所要挾道
德不愧丘與回

東津歸催吳秀才寄酒

荒城懶出門常掩春氣欲歸寒不斂東鄰咫尺猶不到
況乃傍溪潭石險風光得暖才幾日不覺溪山碧于染
欣然與客到西岸衣幘不避塵泥點谷花洲草盛萌芽
高下迸生如刻刻柳條前日尚憔悴時節與催還在再
沙禽翅羽亦已好爭趁午暄浮翠漱君厨山杏舊所識

速致百壺須灑灑心知萬事難刻畫惟有醉眠知不忝
預愁酩酊苦太熱已令灑屋鋪風簟

桐樹

棄地瓦礫間茲桐偶誰樹憶見擁西牆俄成劃煙霧得
時花葉鮮照影清泉助當軒蔽赤日對茲消百慮惜哉
稟受弱妄使鸞鳳顧商聲動猶微秀色觸已沮泣摧亂
繁條逼迫畏清露暄晴幸未闕飄落儻可拒噫號衝飈
回激射陰霰聚此勢復可言瞪觀空薄暮

聽鵲寄家人

鵲聲喳喳寧有知家人聽鵲占歸期物情固不等人事
爾意自驚思別離秋風絮絮正可愛黃菊芙蓉開滿枝
春風千樹變顏色遠水靜照紅霞衣梧桐楊柳豈知數
沙步露冷銀牀欹新黃暗綠各自媚爛漫未減春風時
誰言秋物不可賞人意自移隨盛衰山田正冷酒味美
禾黍半收雞鶩肥霜梨野栗處處有雪蜜薦口清香隨
鄉園物物可想見我意祇隨魂夢飛家人未用占鵲語

應到歸時春亦歸

麻姑山送南城尉羅君

麻姑之路摩青天蒼苔白石松風寒峭壁直上無攀援
懸磴十步九屈盤上有錦繡百頃之平田山中遺人耕
紫煙又有白玉萬仞之飛泉噴崖直瀉蛟龍淵豐堂廣
殿何言言階脚插入斗牛間樛枝古木不記年空槎呀
然卧道邊幽花自嬋娟林深為誰妍但見塵消境靜翔
白鶴吟清猿鵝禽乳鹿徃徃嗥荒顛却視來徑如緣絙

千重萬疊窮崖巒下有荆吳粟粒之羣山又有甌閩一
髮之平川奕棋縱橫遠近布城郭魚鱗參差高下分岡
原千竒萬異可意得墨筆盡禿誰能傳丈夫舒卷要宏
達世路俯仰多拘牽偶來到此醒心目便欲洗耳辭囂
喧羅夫子一日遠補東南官愛此層崖峻壑之秀發開
軒把酒可縱觀喜此披霄插漢之夔起出門舉足得往
還羅夫子一尉龍蛇方屈蟠此邦人人衣食足闔境年
年枹鼓閒几案剗裁得休暇山水登躡遺紛煩我行送

之思故園引領南望心長懸

明妃曲二首

明妃未出漢宮時秀色傾人人不知何況一身辭漢地
驅令萬里嫁番兒喧喧鐵騎方滿眼皎皎丹心欲語誰
延壽爾能私好惡令人不自保妍蚩丹青有迹尚如此
何況無形論是非黃雲塞路鄉國遠鴻鴈在天音信稀
幾成新曲無人聽彈向東風空淚垂

其二

蛾眉絕世不可尋能使花羞在上林自信無由汙白玉
向人不肯用黃金一辭椒屋風塵遠去託氈廬沙磧深
直欲論情通漢地獨能將恨寄胡琴但取當時能託意
不論何代有知音豈知泯泯沈煙霧獨有明妃傳至今

七月一日休假作

初秋尚苦暑歸沐乃君恩地閒少來客日晏猶閉門家
乏念藜藿開顏無一樽況復辭貌拙敢隨車馬奔盥濯
何所事讀書坐前軒豈堪當世用空味古人言頗喜市

朝內獨無塵土喧終年但如此真竊大官餐

李節推亭子

盱江郭東門江水湛虛碧東南望羣峯連延倚天壁長
林相蔽虧蒼翠浮日夕青冥窓戶寒居者非咫尺子初
得從誰有此煙霧宅燕坐遠世喧及門無塵客築亭更
求深緩帶聊自適時花笑婀娜山鳥吟格磔家釀熟新
樽歡言命良席故已輕華簪寧論珍拱壁我亦有畝田
相望在阡陌安得巾紫車過從竹三益

秋夜露坐

白雲飛尚低清露泣猶早風來亦依微濁暑焉得掃客
堂虛四楹灑水恨枯槁喜茲宵漏初露坐散襟抱河明
帶飛觀通遲月白道顧盼塵慮銷瓶泉謝頻倒恨無同
聲人詩義與探討跣跣拂方牀歸卧夢亦好

過介甫歸偶成

結交謂無嫌忠告期有補直道詎非難盡言竟多迂知
者尚復然悠悠誰可語

瞿秘校新授官還南豐

柳色映馳道水聲通御溝雖喜芳物盛未同故人遊
叩門忽去我躍馬振輕裘佩印自茲始過家當少留
中園何時到薇蕨亦已柔山翠入幽屐渚香浮迴舟
阡陌有還徃壺觴時獻酬應笑子雲閣寂寥誰見求

南湖行

二月南湖春雨多春風蕩漾吹湖波著紅少年里
中出百金市上裁輕羅插花步步行看影手中掉旗
唱吳歌

放船縱櫂鼓聲促蛟龍擘水爭馳逐倏親忽遠誰可追
朝在西城暮南溪奪標得雋惟恐遲雷轟電激使人迷
紅簾彩舫觀者多美人坐上揚雙蛾斷瓶取酒飲如水
盤中白筍兼青螺生長江湖樂早濕不信中州天氣和

其二

東南溪水來何長若耶清明宜靚粧南湖一吸三百里
古人已疑行鏡裏春風來吹不生波秀壁如奩四邊起
蒲芽荇蔓自相依躑躅天桃開滿枝求羣白鳥映沙去

接翼黃鸝穿樹飛我坐荒城苦早濕春至花開曾未知
蕩槳如從武陵入十花百草使人迷山回水轉不知遠
手中紅螺豈須勸輕舟短楫此溪人相要水上亦湔裙
家住橫塘散時晚分明笑語隔溪聞

芙蓉臺

芙蓉花開秋水冷水面無風見花影飄香上下兩嬋娟
雲在巫山月在天清瀾素礫為庭戶羽蓋霓裳不知數
臺上遊人下流水柱脚亭亭插花裏闌干飲酒權女歌

臺北臺南花正多莫笑來時常著屐綠柳牆連使君宅
送李撰赴舉

湖水碧槐花黃山川搖落窓戶涼宿雲星稀日東出青
冥風高鴈南翔華堂昨夜讀書客疋馬今朝遊大梁風
鉞拂塵見飛影把握驚人持夜光康衢四闕通萬里天
駟得地方騰驤我留東山意頗卓屏棄外慮無毫芒子
能相從味冲漠捉筭勿暫遲歸裝

送陳郎中還京兼過九江新宅

艤舟金碧照溪沙
帆上風吹五兩斜
罷郡紫泥催向闕
過江紅旆引還家
祇將舊社人攜酒
應喜新林樹著花
莫作山齋久留意
中臺虛位歷清華

遣興

青燈鬪鼠窺寒硯
落月啼烏送迴笳
江漢置身貧作客
溪山合眼夢還家
百憂忽忽丹心破
萬事悠悠兩鬢華
誰與建帆先度鳥
更無留滯向天涯

盆池

環環清泚旱猶深
柄柄芙蓉近可尋
蒼壁巧藏雲影入
翠奩微帶蘚痕侵
能供水石三秋興
不負江湖萬里心
照影獨憐身老去
日添華髮已盈簪

贈彈琴者

至音淡薄誰曾賞
古意飄零自可憐
不似秦箏能合意
滿堂傾耳十三絃

秋日感事示介甫

秋日氣已盛
陰蟲朝暮聲
煙雲斷溪樹
風雨入山城
沙

磧有遺虜旌旗多遠行生民苦未息吾黨恥論兵

訓材叔江西道中作

枉渚荒源百里間草根輕燒舊痕乾
入陂野水冬來淺對樹諸峯雪後寒
塢笛最宜風外聽嶺松初得醉中看
行尋故友心無事不覺西遊道路難

送雙漸之漢陽

楚國封疆最上流夾江分袂兩諸侯
何年南狩風檣出六月西來雪浪浮
夏口樓臺供夕望秦川風物待春遊

可能頻度漁陽曲不負當年鸚鵡洲

贈護仁監院

人貧舉世今為甚僧事新年始更多食糲衣穿雖擾擾
構虛基險自我栽茅改築君初有繫馬長吟我暫過
但覺滿山金碧洞不知誰到為煙蘿

西園席上

省閣名郎國羽儀瀛洲仙客衆著龜山溪向日花開早
海嶠經寒酒熟遲下榻笑談紅旆偃引觴醒醉玉釵隨

惟慙別乘疎頑甚滿足塵埃更有詩

過高士坊

一畝蕭然絕世喧抗懷那肯就籠樊功名晚更為餘事
留異初嘗出至言郡閣已空徐孺榻里人猶識鄭公門
斯文未喪如絲我後代當知李仲元

錢塘上元夜祥符寺陪咨臣郎中文燕席

月明如晝露華濃錦帳名郎笑語同金地夜寒消美酒
玉人春困倚東風紅雲燈火浮滄海碧水樓臺浸遠空

白髮蹉跎歡意少強顏猶入少年叢

酬王微之汴中見贈

黃流渾渾來沙際佳氣葱葱近日邊河漢槎雖通遠客
蓬萊路未縱歸船山城劇飲銷紅燭水驛高吟擘彩殘
老去相逢情自密不關清賞合留連

雪後同徐秘丞皇甫節推孔教授北園晚步

沙草正黃瀕海意江梅還白故園情循除遠水春前急
郭繞春山雪後明林影易斜寒日短角聲吹去暮雲平

最慚佳客忘形契肯伴衰翁著屐行

早起行香

枕前吹落小梅花起見中庭月未斜
微破宿雲猶度雁欲深煙柳已藏鴉
井轆聲急推寒玉籠燭光繁秉絳紗
行到市橋人語密馬頭依約對朝霞

和陳郎中

材薄安時甘寂寞身閒乘興喜登臨
每尋香草牽狂思曾向幽蘭費苦吟
明月幾人非按劍高山從古少知音

數篇清絕賡歌意默見馮唐異俗心

閱武堂

五湖坏冶歸皇極萬里車書共太平胡馬不闕光祿塞
漢家常隸羽林兵柳間自詫投壺樂桑下方安佩犢行
高枕四封無一事腐儒何幸偶專城

鵲山亭

大亭孤起壓城顛屋角峩峩插紫煙灤水飛綃來野岸
鵲山浮黛入晴天少陵騷雅今誰和東海風流世謾傳

太守自吟還自笑歸時乘月尚留連

環波亭

水心還有拂雲堆日日應須把酒杯楊柳巧含煙景合
芙蓉爭帶露華開城頭山色相圍出簷底波聲四面來
誰信瀛洲未歸去兩州俱得小蓬萊

水香亭

臨池飛構鬱峩榭檻無風影自搖羣玉過林抽翠竹
雙虹垂雨跨平橋煩依美藻魚爭餌清見寒沙水滿橈

莫問荷花開幾曲但知行處異香飄

靜化堂

脩簷轍轍背成陰行盡松篁一徑深好鳥自飛還自下
白雲無事亦無心客來但飲平陽酒衙退常攜靖節琴
世路人情方擾擾茲遊須抵萬黃金

凝香齋

每覺西齋景最幽不知官是古諸侯一尊風月身無事
千里耕桑歲有秋雲水醒心鳴好鳥玉沙清耳漱寒流

沈煙細細臨黃卷疑在香爐最上頭

西湖納涼

問吾何處避炎蒸十頃西湖照眼明魚戲一篙新浪滿
鳥啼千步綠陰成虹腰隱隱危橋出鷓首莪莪畫舫行
最喜晚涼風月好紫荷香裏聽泉聲

酬強幾聖

俯仰林泉繞舍清經年閒卧濟南城山田雨足心無事
水榭花開眼更明新霽煙雲飛觀出晚涼歌吹畫橋橫

寄聲裴令樽前客，祇欠高談一座傾。

甘露寺多景樓

欲收嘉景此樓中，徙倚闌干四望通。
雲亂水光浮紫翠，天含山氣入青紅。
一川鐘唄淮南月，萬里帆檣海外風。
老去衣衿塵土在，祇將心目羨冥鴻。

雨中王駕部席上

鳩鳴連日始成陰，薄雨聊寬望歲心。
浴鴈野塘新浪細，藏鴉宮柳嫩條深。
春寒巧放花遲發，人老嗟辭酒滿斟。

英雋並遊知最幸名園偷暇更追尋

送陳世脩

沙渚鴻飛入楚雲遠林樵爨宿煙昏娟娟野菊經秋澹
漠漠蒼江帶雨渾歸路賞心應駐節客亭離思暫開樽
莫嗟問俗淹翔久從此頻繁不次恩

峴山亭置酒

石磴縈迴入杳冥筠松高下簇虛亭春歸野路梅初白
雪盡沙田麥正青馬窟飛雲臨畫棟鳳林斜日照疎櫺

長年酒量殊山簡却上籃輿恨獨醒

遊東山

虞寄庵餘蘚徑通滿山臺殿出青紅難逢堆案文書少
偶見凭欄笑語同梅粉巧含溪上雪柳黃微破日邊風
從今準擬頻行樂日伴樽前白髮翁

聖泉寺

笑問并兒一舉鞭亦逢佳景暫留連清冥日抱山腰閣
碧野雲含石眼泉躡屐路通林北寺落帆門繫海東船

閩王舊事今何在，惟有前村供佛田。

出郊

葛葉催畊二月時，斜橋曲岸馬行遲。
家家賣酒清明近，紅白花開一兩枝。

壽聖院昌山主靜軒

一峯瀟灑背城陰，碧瓦新堂地布金。
花落禪衣松砌冷，日臨經帙紙窓深。
幽棲鳥得林中樂，燕坐人存世外心。
應似白蓮香火社，不妨籃輦客追尋。

和史館相公上元觀燈

九衢仙仗豫遊歸，寶燭星繁換夕暉。
傳醖未斜清禁月，散花還拂侍臣衣。
天香暗度金蚪煖，宮扇雙開彩鳳飛。
法曲世人聽未足，却迎朱輦下端闈。

集賢院春燕呈諸同舍

御爐風細麝煙浮，法樂聲和酒味柔。
冠劍九重霄漢路，鶯花三月帝王州。
重廊四合盤龍幕，當殿雙高彩鳳樓。
歸去人人誇雨露，總含歡喜躍驂騑。

題饒君茂才葆光庵

適意藜羹與布裘
結廬人境地還幽
清談汝水孤猿夜
爽氣麻源一葉秋
應有風騷歸健筆
可無尊酒付扁舟
因君更起家園興
夢寐思從几杖遊

石倉歷代詩選卷一百四十四

欽定四庫全書

石倉歷代詩選卷一百四十五

明 曹學佺 編

宋詩二十二

王珪

大饗明堂慶成

皇祐更秋律明堂奉帝禋
梁盛雖薦德霜露本懷親
於赫朝三后無文秩百神
九筵交玉幣重屋近星辰
邃幄

留飈御清壇墮月津衣冠漢儀舊金石舜韶新受昨開
宣室鳴鐘降紫宸羣陰光復旦叶氣斗迴春露貺叢千
祝豐恩滲四垠慙非老辭筆徒學煥堯文

吳永叔書事

誥書初捧下西箱重棘連催暮鑰忙綠繡珥貂留帝詔
紫衣鋪案拜宸香卷如驟雨收聲急筆似飛泉落勢長
十五年前出門下最榮今日預東堂

依韻恭和聖製上元觀燈

雪消華月滿仙臺萬燭當樓寶扇開雙鳳雲中扶輦下
六鼇海上駕峯來鶴宮春酒霑周宴汾水秋風陋漢材
一曲昇平人盡樂君王又進紫霞杯

梅花

冷香疑到骨瓊艷幾堪餐半醉臨風折清吟拂曉觀贈
春無限意和雪不勝寒桃李有慚色枯枝試並攔

遊山寺

寒日征驂懶復迴經宵仍喜駐巖隈逕盤幽跡遙知鹿

林迥清香定有梅
曉影瘦猿窺澗溜
夜深肥犂炆爐灰
我心非動亦非靜
白足禪僧無妄猜

依韻恭和聖製龍圖天章閣觀三聖御書

半夜傳君召西清
閱帝文筆迴丹穴
鳳歌起沛鄉雲御
幄金蚪轉仙墀
羽仗分君王自天
縱況復睿心勤

和王原寂內翰有懷

暮鑰嚴溫省宵鈴
靜浴堂銀花無奈
萎瑤草又還芳夢
久聞仙笛班清
犯曉霜帝閣何所
叩一炷祝堯香

次韻和元厚之平羌

詔收新土鳳林東，四百餘年陷犬戎。
葱嶺自橫秦塞上，金城還落漢圖中。
輕裘坐歛無遺策，解髮來庭有舊風。
零雨未濛音已捷，不勞歸旅咏周公。

聞仲諤脂米川大捷

神兵十萬忽乘秋，西磧妖氛一夕收。
疋馬不嘶榆塞外，長城自起玉關頭。
君王別繪凌煙閣，將帥今輕定遠侯。
莫道無人能報國，紅旗行去取涼州。

依韻和吳相公從駕至開寶寺慶壽崇因閣

崇因開寶構金碧畫相輝禁蹕隨曦馭層城轉斗機梵
音獅子吼妙相鴿王歸洛水浮神篆天花散御衣塔疑
從地湧棟擬入雲飛上行乘今果羣趨懼昨非慧珠常
自照法雨徧成霏但起真如念梯梁不可幾

和金陵懷古

懷鄉訪古事悠悠獨上江城滿目秋一鳥帶煙來別渚
數帆和雨下歸舟蕭蕭暮吹驚紅葉慘慘寒雲壓舊樓

故國淒涼誰與問
人心無復更風流

宮詞

金鈿畫角警場開
天子南郊玉輅來
十里青城遙北望
綵雲宮殿月樓臺

鼓角三聲夜奏嚴
夕齋清廟宿重簾
殿前太尉橫銀仗
指點金盆御水添

鑾輿昨夜宿郊壇
月淡風低綵帳寒
密寫銷金紅榜子
宮中日日報平安

禁籞春來報踏青御池波漾碧漣輕內人爭送鞦韆急
風隔桃花聞笑聲

露井銀牀凍不收深宮花暗曉鶯愁殘紅滿地無人掃
一半隨風落御溝

昨日龍輿幸寶文宸毫金軸展風雲前朝御印從頭圻
重整牙籤甲乙分

盤龍新織翠雲裘簡點黃封玉匣收防備秋來供御著
金箱捧入曝衣樓

十三垂髻碧螺髻學舞經年後苑中近日昭儀抄姓字
一時宣撥入東宮

內庫從頭賜舞衣一番時樣一番宜才人特地新裝束
生色春衫畫折枝

黃金掌上露華飛朝退君王索輦遲到得經筵春講罷
海棠花影數甌移

焚香重熨赭黃衣恐怕朝陽御進遲禁鼓五更交早直
歸來還是立班時

素英飄灑作宵寒一寸金花燭淚殘
連夜對香宣兩府
平明謝雪到齋壇

盡日閉窓睹選僊小娃爭覓倒盆錢
上籌爭占蓬萊島
一擲乘鸞出洞天

麗日祥煙銷禁林櫻桃初熟杏成陰
年年翠輦來遊幸
花落春宮一寸深

夕宴中秋醉廣寒閭風銀闕鎖三山
美人半夜歌明月
聲在玉壺天地間

新供御馬可曾騎青鬣連錢碧玉蹄每到殿前祇候駕
金鞍卸下不曾嘶

六龍觀稼奉宸遊齊賀豐年薦麥秋後苑宴回卿相出
內官金合送來麩

大家裝著鬪時宜獨自尋常拂淡眉為染淺黃衫子色
金盆添水看鷺兒

簾搖翡翠金風晚瓦濕鴛鴦玉露天秋殿曉開重九宴
內人爭貼菊花鈿

崇文殿裏勝蓬萊繡柱扶天秘閣開典籍校讐三閣外
圖書多出禁中來

六宮春色醉仙葩綺戶沈煙望翠華琥珀盤生山芍藥
絳紗囊佩木香花

花外闌干壓翠簷水邊金閣半垂簾內砧敲月黃昏後
坐覺春風一倍添

端午生衣進御牀赭黃羅帕覆金箱美人捧入南薰殿
玉腕斜封綵縷長

選進仙韶第一人才勝羅綺不勝春重教按舞桃花下
只踏殘紅作地裯

七寶闌干白玉除新開涼殿幸金輿一溝泛碧流春水
四面瓊鈎搭綺疏

山樓綵鳳棲寒月宴殿金麟吐御香蜀錦地衣呈隊舞
教頭先出拜君王

天外明河翻玉浪樓西涼月湧金盆香銷甲乙牀前帳
宮鎖玲瓏閉殿門

西風歛葉撼宮梧
早怯秋寒著繡襦
玉宇無人雙燕去
一彎新月上金樞

夜寒金屋篆煙飛
燈燭分明在紫薇
漏永禁宮三十六
燕回爭踏月輪歸

晚吹翩翩動翠旗
爐煙千疊瑞雲飛
何人奏對偏移刻
御史天香隔繡衣

金井秋啼絡緯聲
出花宮漏報嚴更
不知誰是金鸞直
玉宇沈沈夜氣清

內庭秋燕玉池東
香散荷花水殿風
阿監探菱牽錦纜
月明猶在畫船中

東宮花燭綵樓新
天上仙橋不鎖春
徧出六宮歌舞奏
姮娥初到月虛輪

紗幔薄垂金麥穗
簾鈎纖掛玉葱條
樓西別起長春殿
香碧紅泥透蜀椒

翠華香重玉爐添
雙鳳樓頭曉日暹
扇掩紅鸞金殿悄
一聲清蹕捲珠簾

金作盤龍繡作麟
壺冰樓閣禁中春
君王避暑來遊幸
風月橫秋氣象新

清曉自傾花上露
冷侵宮殿玉蟾蜍
擘開五色銷金紙
碧鎖窓前學草書

翠鈿貼靨輕如笑
玉鳳雕釵裊欲飛
拂曉賀春皇帝閣
綵衣金勝近龍衣

鎖聲金掣閣門環
簾捲真珠十二間
別殿春風呼萬歲
中丞新押散朝班

鷄人報曉傳三唱玉井金牀轉轆轤煙引御爐香繞殿
漏籤初刻上銅壺

御案橫金殿幄紅扇開雲表露天容太常奏備三千曲
樂府新調十二鐘

宮女燠香進御衣殿門開鎖請金匙朝陽初上黃金屋
禁掖春深晝漏遲

三月金明柳絮飛岸花堤草弄春時樓船百戲催宣賜
御輦今年不上池

內人稀見水鞦韆爭擘珠簾帳殿前第一錦標誰奪得
右軍輸却小樓船

夜色樓臺月數層金猊煙穗繞觚稜重廊屈折連三殿
密上真珠百寶燈

天門晏閉九重關樓倚銀河氣象間一點星毬垂絳闕
五雲仙仗下蓬山

禁裏春濃蝶自飛御蚕眠處弄新絲碧窓盡日教鸚鵡
念得君王數首詩

鬪草深宮玉檻前
春蒲如箭荇如錢
不知紅藥欄干曲
日暮何人落翠鈿

太液波清水殿涼
畫船驚起宿鴛鴦
翠眉不及池邊柳
取次飛花入建章

御座垂簾繡額單
冰山重疊貯金盤
玉清迢遞無塵到
殿角東西五月寒

春心滴破花邊漏
曉夢敲回禁裏鐘
十二楚山何處是
御樓曾見兩三峯

釣線沈波漾彩舟魚爭芳餌上龍鈎內人急捧金盤接
撥刺紅鱗躍未休

蕙炷香銷燭影殘御衣熏盡徹更闌歸來困頓眠紅帳
一枕西風夢裏寒

禁裏宮鶯曉未啼千牛仗下報班齊銀袍五百趨龍尾
天子臨軒賜御題

洛陽新進牡丹叢種在蓬萊第幾宮壓曉看花傳駕入
露苞初坼御袍紅

碧桃花下試枰碁
誤算籌先一著低
輸却鈿釵雙翡翠
可勝重勸玉東西

侍輦歸來步玉階
試穿金縷鳳頭鞋
堦前摘得宜男草
笑插黃金十二釵

瑤臺夜滴金莖露水
殿涼生玉枕風
卧看星河歸閣晚
月斜疎影轉梧桐

臨明一陣梨花雨
夢隔珊瑚斗帳明
後苑樂聲催引駕
春衫初試覺身輕

盆山高疊小蓬萊檜柏屏風尾開綠遶金堦春水濶
新分一脈御溝來

內苑宮人學打毬青絲飛控紫花騮朝朝結束防宣喚
一樣真珠絡轡頭

夜深獨倚闌干角玉笛橫吹弄月明餘響度雲無處覓
人間聞得兩三聲

新學琵琶曲破成仙韶第一已知名朱絃未落黃金撥
玉腕先聞動劍聲

太尉洮岷破敵迴腰垂金帶入關來殿前獻壽天顏喜
花覆千官拱御杯

元夕星燈照露臺六宮歌吹出雲來夜深翠輦歸金殿
十里迴廊錦帳開

後苑歸來月上初天歌吹引六鸞輿春風料峭餘寒重
猶索金函覽奏書

金鷄竿下龍旗動萬國華夷拜冕旒十二門開傳詔急
祥雲捧日在樓頭

數騎紅妝曉獵還銷金羅襪鏤金鐙佯佯走馬穿花過
拂拭雕弓對御彎

晚來東殿放笙歌外院池亭得暫過深炷爐香登月榭
闌干西角拜嫦娥

中宮賜雪玉成峯滴露堆寒冷照空三十六窓明月夜
嫦娥渾在水晶宮

兩班齊賀玉闌清新奏熙州曲破成畫鼓連聲催擷徧
玉人多半未知名

沈煙搖碧透金鋪
密下珠簾鎮玉壺
近賜趙昌花雀陣
却嫌崔白芰荷圖

內庫新函進御茶
龍團春足建溪芽
黃封各各題名姓
賜入東西兩府家

博士當年教玉筭
六宮誰敢鬪新聲
如今舊曲無心理
寶柱一行秋鴈橫

宮人捧硯臨香案
一幅春綃展素霞
玉筋彎環題御篆
風雲金殿起龍蛇

銀盆著水灑毬場馬嚼銜聲立兩行齊上玉鞍隨仗列
粟金腰帶小牌方

三殿飛雲禁鑰開風從天上送香來諸番玉帛朝元日
齊獻南山萬壽杯

黃昏鎖院聽宣除翰長平明起起居撰就白麻先進草
金泥降出內中書

魚藻宮中淑景長鴨頭新水御池塘奇花深院門門閉
總被春風漏洩香

石刻蛟龍扶繡柱金盤龍鳳走雕楹萬年枝上流鶯轉
屏掩春山夢不成

紅濕春羅染御袍透簾三丈日華高金針百尺穿縫處
一對盤龍落剪刀

雪晴鴉鵲樓邊月風落昭陽殿後梅爐炭炮消香獸暖
獨拈香箸撥紅灰

花香著葉藏蜂翅柳影拖金入鎖窓舞鑑曉鶯無奈隻
認歸梁燕却成雙

玉兔何年上月宮
夜深搗藥特無蹤
神丹不老嫦娥髮
乞取刀圭駐玉容

萱草成窠杏子青
夜聞禁漏曉聞鶯
吹回一覺昭陽夢
帳外春風太薄情

翡翠盤龍裝繡額
真珠雙鳳感花毬
時聞玉女牽簾笑
箭躍銅壺不算籌

迢遞金壺漏水長
輪更傳點報君王
諸宮各進時新果
堆著龍牀駐夜香

殿下排場擊土牛君王玉仗久遲留外人爭卜宜春喜
奪得金泥各自收

千年一偶聖人生豈特河清海亦清瑞應固宜流樂府
行看絲竹有新聲

小雨霏微潤綠苔石欄紅杏傍池開一枝插向金瓶裏
捧進君王玉殿來

石倉歷代詩選卷一百四十五

欽定四庫全書

石倉歷代詩選卷一百四十六

明 曹學佺 編

宋詩二十三

米芾

題多景樓

欲雨氣不透庭梧亘棲煙回首望北固雲藏淨石天呼
童治籃輦憑高覽山川隱見豈不好開霽景固全須史

江風流湛湛清露圓歸途知有伴華月上丹淵

擬古

青松勁挺姿凌霄恥屈盤種種出枝葉牽連上松端秋
花起絳煙旖旎雲錦殷寧羞不自立舒光射九九栢見
吐子效鶴疑縮頸還青松本無華自得保歲寒

秋登峴山

皎皎中天月團團徑千里震澤乃一水所占已過二娑
羅卽峴山謬云形大地地維東吳偏山水古佳麗中有

皎皎人瑀衣玉為珥幽操久獨處迢迢孰招類金颺帶
秋威歛逐雲檣至朝隅輿馭颺暮過光浮袂亭亭太陰
宮無乃瞻星氣興深夷險一理洞軒裳偽紛紛夸俗勞
坦坦忘懷易浩浩將我行蠢蠢須公起

寄紹彭

蕭李駿子弟不收慰問帖妙跡固通神水火土更劫所
存慰問者班班在箱笈使惡乃神護不然無寸札自此
輒畫相後人眼徒攝

題子敬范新婦唐摸帖

貞觀欵書文二紙不許兒竒專婦美何為寥寥寶是似
遭亂歸貞火兼水千年誰人能繼趾不是名家殊未智
嗟爾方來眼次洗玉躡金題半歸米

雲物龍蛇森動紙父子王家真濟美張翼小兒寧近似
滄溟浩對蹄涔水騰蛇無足鼯多趾以假易真信用智
龜澥雖多手屢洗卷不生毛誰似米

送王渙之彥舟

集英春殿鳴擗歌神武天臨光下徹鴻臚初唱第一聲
白面玉郎年十八神武樂育天下造不使敲枰使傳道
衣錦東南第一州棘壁湖山兩清照襄陽野老漁竿客
不愛紛華愛泉石相逢不約無逆輿握古圖書同岸幘
淫朋嬖黨初相慕濯髮洗心求易慮翩翩遼鶴雲中侶
土苴虺鴟那一顧過來器業何深至湛湛具區無底止
可憐一點終不易枉駕殷勤尋漫仕漫士平生四方走
多與羣才並肩肘少有俳辭能罵鬼老學鴟夷但存口

一官聊具三徑資取捨殊途莫迴首

西山書院丹徒私居也上皇樵人以異石來告

余凡八十一穴狀類泗淮山一品石加秀潤

焉余因題為洞天一品石以麗其八十一數

令百夫輦致寶晉齋又七日甘露下其石梧

桐柳竹椿杉蕉菊無不霑也自五月望至廿

六日猶未已因思之作此詩

我思岳麓抱黃閣飛泉元在半天落石鯨吐出流千里

赤日露下陰紛薄
我曾坐石浸足眠
肘項抵水洗背肩
客時效我病欲死
一夜轉筋著艾燃
如今病渴擁爐坐
安得重往卧石邊

閨門舟中戲作呈伯原

蘋風忽起吹舟悍
雨打圖書藏裘亂
閨門咫尺不安流
星宿浮槎寄江漢
吳王故苑古長洲
潮汐池邊一佇留
秀蕙芳蘭無處所
荒莞叢葦滿清流

題蘇之孟家薛稷二鶴

遼海未須顧螻蟻仰霄孤
唳留清耳從容雅步在庭除
浩蕩閒心存萬里乘軒未失人
佳談寫真不妄傳詩史
好事心靈自不凡臭穢功名皆一戲
武功中令應天人
束髮寮陽侍帝宸
連城照乘詎惜寶
皇圖禮誥誰珍真
百齡生我欲公起
九原蕭蕭松嶷嶷
得公遺物非不多
賞物懷賢心未已

雜詠

揚清歌發皓齒
北方佳人東鄰子
且吟白紵停綠水
長

袖拂面為君起寒雲夜卷霜海空胡風吹天飄塞鴻玉
顏滿堂樂未終館娃日落歌吹濃絃歌興罷拂衣返棄
米何嘗有俸錢恩自大鈞能逐物只應訪藥是優賢

貞娘墓歌

何不學仙冢纍纍白楊西郭陰風悲虎丘一叩貞娘墓
薜荔援牆委蘭露千歲蒙茸幾樹花夜飄鬼火曉啼鴉
向憐挾瑟彈清月猶憶吹簫乘彩霞吳閨少年往來道
黛娥釵燕誰能好酒滴春雲夢不消泉聲幽咽鐘聲老

陌上行遊緩緩歸昨日紅顏今日非東望闔閭穿莽處
玉鳧將化湛盧飛

余嘗磋越竹光滑如金版在油拳上短截作作

軸入笈番覆一日數十張學書作詩寄劉薛

越筠萬杵如金版安用杭油與池墨高壓巴郡烏絲欄
平欺澤國清華練老無他物適心目天使殘年同筆研
圖書滿室翰墨香劉薛何時眼中見

揚州

東風何索寞帶雪入揚州尚想遺釵雀重觀上玉鈎真
同一夢覺空憶十年遊邂逅逢孫楚酣歌慰滯留

將之茗溪戲作呈諸友

松竹留因夏溪山去為秋久賡白雲詠更度采菱謳縷
玉鱸堆案團金橘滿洲水宮無限景載與謝公遊

余居半載諸公載酒不輟而余以疾每約置膽
清話而已復借書劉李周三姓

好懶難辭友知窮豈念通貧非理生拙病覺養心功小

圓能留客青冥不厭鴻秋帆尋賀老載酒過江東
旅食緣交駐浮家為興來句留荆水話襟向卞峯開過
剡如尋戴遊梁定賦枚漁歌堪畫處又有魯公陪

觀音巖

秦驅禹鑿已寥寥却為高人得姓焦鮑餌有時邀楚釣
海雲常覺護山樵巖多陰霧龍藏角蛙蛙蒼林玉露臙
濁氣不侵靈貺下方壇曾駐紫清颺

山光寺

竹園山徑晚風清，又入山光寺裏行。
一一過僧談舊事，遲遲繞屋認題名。
仙來石畔懷灰劫，鶴語池邊勸後生。
三十年間成底事，空叨薄祿是浮榮。

望海樓

雲間鐵甃近青天，縹緲飛樓百尺連。
三峽江聲流筆底，六朝帆影落尊前。
幾番畫角催紅日，無事滄洲起白煙。
忽憶賞心何處是，春風秋月兩茫然。

重九會郡樓

山清氣爽九秋天黃葉紅葉滿泛船千里結言寧有後
羣賢畢至漫居前杜郎閒客今焉是謝守風流古所傳
獨把秋英綠底事老來情味向詩偏

甘露寺

六代蕭蕭木葉稀樓高北固落殘暉兩州城郭青煙起
千里江山白鷺飛海近雲濤驚夜夢天低月露濕秋衣
使君肯負時平樂長倒金鍾盡醉歸

詠潮

怒氣號聲迸海門
州人傳是子胥魂
天排雲陣千家吼
地擁銀山萬馬奔
勢與月輪齊朔望
信如壺漏報晨昏
吳亡越霸成何事
一唱漁歌過遠村

垂虹亭

斷雲一片洞庭帆
玉破鱸魚霜破柑
好作新詩寄桑苧
垂虹秋色滿東南

中秋登望海樓

目窮淮海滿如銀
萬道虹光育蚌珍
天上若無脩月戶

桂枝撐損向西輪

竹西寺


竹西桑柘暮鴉盤
特地霜風滿倦顏
不用使君相料理
都緣塵土蔽青山

五代楊氏據江封金山龍王為下元水府在其
下雖大水不能沒余登山賦系以詩

插雲樓殿壓滄冥
笑語風狂伴暑清
誰為抉雲開皎月
練飛雪捲看潮生

壯觀亭

邀賓壯觀不辭寒玉立風神氣上千欲識謝公清興處
千重岩嶺雪漫漫



石倉歷代詩選卷一百四十六

欽定四庫全書

集部

石倉歷代詩選卷一百四十七至九

詳校官廉吉士臣范逢恩

侍讀臣孫球覆勘

總校官進士臣朱鈐

校對官中書臣方大川

謄錄監生臣王鑫

欽定四庫全書

石倉歷代詩選卷一百四十七

明 曹學佺 編

宋詩二十四

蔡襄

陪諸君會史館園

名園霽宿雨春日正和柔花香泛草際竹影搖清流鳴禽自往還遊魚時沈浮出門市朝喧愛此林亭幽况陪

君子讌飛筭遞相酬亦有佳人攜艷歌清眉愁佳人足
娛適遠思何夷猶故鄉去千里野堂臨溪頭夢寐別四
載南望無時休王粲昔從軍登樓以銷憂今余豈不然
每到終遲留

楊叔武北堂夜話

歲晏物景薄層陰向晚饒輕雲隱微月殘雪棲枯條夫
君有高適顧我慰寂寥瀟洒開北堂拂榻延良宵前几
陳古書坐見千載遙問亦發新句幽思含九韶神明靜

外照念慮醉中消揚雄戒丹轂顏子安一瓢良玉不火
變翠栢寧霜彫此心固獨往聲利詎得招

遊鼓山靈源洞

郡樓瞻東方嵐光瑩人目乘舟逐早潮十里登南麓雲
深翳落前樹暗迷幽谷朝雞亂木魚晏日明金屋靈泉
注石竇清吹出篁竹捫蘿躋上峯大空延眺矚孤青浮
海山長白挂天瀑况逢肥遯人性尚自幽獨西景復向
城淹留未云足

記題滁州豐樂亭

君為滁上守乘閒務幽尋羣從留山阿美望窮前林良
讌追佳賞高亭曠遐臨煙雲無定姿水石惟清音靜見
魚鳥適遙聞雞犬深時節屢豐有民里無欺侵豈獨延
衆物因茲託冲襟大筆每絕唱芳樽寧孤斟別日念已
長來期詎能今安得凌風翰相從殫歲陰

出東門向北苑路

曉行東城隅光華著諸物溪漲浪花生山晴鳥聲出稍

稍見人煙川原正蒼鬱

北苑

蒼山走千里斗落分兩臂
靈泉出地清嘉卉得天味
入門脫世氛官曹真傲吏

西齋秋暑

齋居一室靜晝永來風微
仙碁覆前局女布便輕衣
向人顏色強與世心事違
且効金門隱詎有田園歸

丙申秋八月過漁溪驛驛舊有梅數株嘗題詩

記今無有也

曾把蚤梅枝思君在別離別離雖云遠萬里終還期樹
枯根已撥人去復何之故館動秋色雲物藏寒曦清香
不可聞衰草空繁滋一夜平堦雨輾轉良自知

訪天台庵

幽人去未還門戶和雲閉亭午樹陰圓深冬泉響細寒
生羣虫蟄清徹孤鶴唳寂莫傍山歸寫向滄溟際

留別舊居花檻

別意起中夕出門風吹衣側月光艷薄餘花香氣微清
尊歲相向欲去心有違殘葩勿盡放主人行亦歸

上元進詩

疊聳青峯寶炬森端門方佇翠華臨宸遊不為三元夜
樂事全歸萬衆心天上清光開夜色人間和氣閣春陰
要知盡作華封祝四十年來惠化深

夢中作

白玉樓臺第一天琪花風靜彩鸞眠誰人得似秦臺女

吹徹雲簫上紫煙

龍臺

試看初日照龍臺
白玉高堂錦障開
樹色一番連雨淨
溪光幾曲抱山來
雲歸深洞天形瘦
風落前村笛弄哀
擬結青樓徧題詠
思王何吝斗量才

陳將軍廟

曾憑水柵誓長江
報國全軀事不雙
力屈已嗟袁粲死
勢孤猶笑李陵降
宿墳古劍龍腥匣
壞壁靈旗獸繞扛

神理高高人意近楮錢祈福暗塵窓

城南春會

陰雲薄薄地無塵清曉城南集畫輪
睢苑即時裁雪霰
潁川連夜聚星辰
山眉帖漢晴光擬鶯舌
尋風碎語真
芳草有情迷謝客
落花無主問秦人
樽前莫厭歌醒耳
世上偏饒淚滿巾
嘉意未闌繁盛減
東皇底事惜殘春
奉酬王知縣賞春不與以詩見贈

仙陬翠觀盡繁英
朱白相兼照眼明
池浸嵐光生晚碧

鳥驚人語斷春聲談諧遽喜開懷久
翫斲終慙走筆成
佳致可能陶靖節
庭柯斜盼獨忘情

次韻翠嵒寺

攬蔓崑崙峻交繩寶界平
斜峯約雲勢密樹起秋聲
泉檻妨蛩響霜樓助月明
冥筌兼洒落警句一何清

夏晚南野

夏竹園前檻涼襟折舊醪疊雲封日
茜斜雨著虹明魚
動池開暈蟬移樹減清
葭洲煙向暝鳧鷺自相迎

蕪陰樓上

野馬沈寒氣神禽度暖風
斷霞天共紫斜日樹齊紅
山口橫虛釣江隈跋遠蓬
解窮千里目爭奈思無窮

陪尹子漸申安禮宿香山寺

二月已強半尋春登石樓
山光侵暮變草色到雲休
歸鳥沈巖際行人過樹頭
剝苔看石碣因火認漁舟
漸夜灘聲惡憑虛屋勢浮
乘閒聊自適觴詠屬吾流

過天津橋

日暖溪平水漸銷水聲纔下內前橋山川滿眼閒宮殿
草樹迷人舊市朝每向尋春偏有意却成懷古更無聊
洛陽平昔多豪俊惆悵埋魂不可招

和丘提刑寄湖南賈度支

何處多離感山郵霽野光清吟貫騷雅遠意屬荆湘霜
樹呈秋色風蘭逗晚香使軺偏倚望摛藻寄回腸

和丘提刑聞新鴈寄度支

翔鴈來江渚秋容在遠空幾聲疎樹外一字斷雲中虛

館垂簷月平臯敗葉風裁詩託幽思幽思更無窮

遊龍門香山寺

彩閣縈林轉蒼崖隔水開龕明千像日波起一灘雷綠
淺春前草香餘臘後梅背人驚鷺去將雨好風來雲氣
隨衣袂嵐光入酒杯清遊知不屢欲下更徘徊

嵩陽道中

千里動秋意縈迴登古原山樵斲晚日野火著松門鐘
磬出隣寺牛羊下遠村振衣歸去好塵事厭知繁

送別陳北部

祖向西郊道川原畫閣臨
燒痕經雨活樹色入谿深
斜日明春態孤雲感客心
何人知別意重把酒杯斟

宿揚州

瓜洲堰埭阻行橈更待江頭後
信潮獨背殘燈數歸路
風傳寒柝夜迢迢

宿延平津

鳴籟蕭森萬木聲濃嵐環合亂峯青
樓臺矗處雙溪會

雷電交時一劍靈
曉市人煙披霽旭
夜潭漁火鬪寒星
畫屏曾指孤舟看
今日孤舟在畫屏

題漁溪驛

昔年同向臘中迴
曾逸欄干折早梅
今日獨來攀舊樹
風翻黃葉下蒼苔

興化軍曹殿丞寄荔枝

厚葉纖枝新絳囊
使君分寄驛人忙
彩毫封處曾留意
筠籠開時不減香
風色甚豪應少損
路程差近得分嘗

閩州縱有千千樹未抵家園氣味長

飲薛老亭晚歸

終日行山不出城
城中山勢與雲平
萬家市井魚鹽合
千里川原彩錯明
坐上潮風醒酒力
晚來岩霧蓋鐘聲
歸時休得然官燭
在處林燈夾道迎

江村

黯淡江村春日斜
汀洲芳草野田花
孤舟橫笛向何處
竹外炊烟三兩家

三月再還家

曉樹鄉關路春衣使者軺江眠聞落霰野飯掇新苗入
里威稜減寧親喜氣饒勤勤父師教疾苦若為消

建溪桃花

何物山桃不自羞欲乘風力占溪流仙源明有重來路
莫下橫枝礙客舟

晝寢宴坐軒憶與蘇才翁會別

投涼下馬卧僧家遶簟清風卷絳紗脩竹滿前微雨過

遠山無際薄雲遮武侯舊隱人應到閩粵孤城日自斜
解與塵心消百事更開新焙煮靈芽

嘉禾郡偶書

盡道瑤池瓊樹新仙源尋到不逢人陳王也作驚鴻賦
未必當時見洛神

哭賈少卿

畫旗南度謫長沙粵海新思路更賒子日鵬來知主去
辰年龍會為賢嗟猶多婚嫁先捐館無復田園可寄家

曾是德公推獎厚一觴何處醉魂車

宿漁梁驛

庭樹疎疎河漢低瓦溝霜白月平西
寒鴉不奈單棲苦
落泊驚飛到曉啼

寓居興化轉運廨舍

病惱連春夏居閒意味長
海風生永晝山雨送微涼
書帙梅蒸潤衣巾荔實香
塵緣消遣盡物我兩俱忘

丙申五月遊興化西門上溪

尋谿因過上溪遊雨後溪渾水亂流因傍堤松却飛葢
為聞山鳥嘅鳴騶平田擺極青雲合滿谷芭蕉碧玉抽
開濟無功須早去故時瓜隴有通侯

仁宗皇帝挽詞

儉薄留遺詔遵行在繼承桐棺會稽冢瓦器孝文陵闕
外秋螢度林端曉月澄須知無可欲終古不騫崩

其二

萬世威神在多方惠澤隆密音通塞壤行哭亦兒童畫

翠離丹闕幽堂對紫嵩孤臣空雨泣白首抱遺弓

昭陵行

宮人上塚候昏鐘簾外香煙燭影紅庭栢飛霜陵漏永
可憐今夜月明中

有遺梅花枕前者因成

誰寄梅花置枕傍前時復得枕清香因香夢徹江南路
江水浮天月似霜

洪澤阻風

今日風期惡遲迴一水濱村旗呈酒聖廟鼓賽河神躍
鯉曾驚網飢鳥不避人商工時借問何處即通津

和答孫推官久病新起見過錢塘之什

于世無機是海翁客情醒醉任隣鐘廉纖雨意還侵夜
料峭春期未減冬寶氣上浮南掩玉歲寒中立不凋松
君王自結英雄網千載風雲定有從

和偶登安濟亭

津亭遙望草萋萋空曠清懷與物齊春水倒行潮欲上

晚雲平壓日先低，高城覽古人何在，遠渡傷離客自迷。
好共山翁同出處，不隨朝騎五門西。

和江上觀潮

地卷天回出海東，人間何事可爭雄。千年浪說鷓夷怒，
一信全疑渤澥空。寂靜最宜聞夜枕，崢嶸須待駕秋風。
尋思物理真難測，隨月虧圓亦未通。

開州園縱民遊樂二首

風日朝來好，園林雨後清。魚遊知水樂，蝶戲見春晴。草

軟迷行跡花深隱笑聲觀民聊自適不用管絃迎

其二

節候近清明遊人出踏青插花穿戟戶酤酒向旗亭日
迴林光潤風迴海氣腥未知何處樂歸路已嚴扃

遣興

苦竹生筍四五寸櫻桃開花千萬枝空濛野色當樓處
索寞春寒帶雨時已放清歌逐瑤管旋筍新釀行金卮
衰翁酩酊自為樂舉鞭不問并州兒

上巳日州園東樓

地上多于枝上花，東樓凝望惜年華。
潮頭正對伍員廟，燕子爭歸百姓家。
粉籜漸高山徑筍，綠旗初展石岩茶。
流芳自與人兼老，樽酒相逢莫重嗟。

渡南澗

隱隱飛橋隔野煙，石磯西畔問漁船。
桃花盡日隨流水，洞在清溪何處邊。

入天竺山留客

山光物態弄春暉，莫為輕陰便擬歸。
縱使晴明無雨過，入雲深處亦霑衣。

十三日出趙園觀花

水際開花千萬窠，初鶯時逐麗人歌。
欲知太守行春樂，只向東城得最多。

伏承躬侍安輿出遊，煙霞洞拙詩奉呈運使學士

新晴特地入煙霞，道並南山轉更賒。
幽磬過隣溪口寺。

衆雞鳴午野人家洞深隨溜光如雨石古籠籐亂放花
潘岳小園猶作賦輕軒選勝樂無涯

杭州璘上人以花栽數種見寄

名園參差十數窠高船十里任風波土花分破根株小
春色隨來意緒多欲種更看移樹法將開須與傍欄歌
中年漸不勝杯酌紅翠他時奈爾何

徐虞部以龍尾石硯邀余第品仍授來使持還

書府

玉質純蒼理緻精鋒鉞都盡墨無聲相如間道還持去
肯要秦人十五城

大湖驛寄建州同年實職方

別驛臨溪曲清寒結曉陰灘聲生亂石雨意在閒林登
第年華久相逢禮愛深茶山春物近那得共追尋

春日

東風吹雨濕鞦韆紅點棠梨爛欲燃擬買芳華贈年少
紫榆春小未成錢

桃杏園

上有繁葩下落英紅波動蕩逐風行夕陽開處猶光艷
何況今宵值月明

和楊龍圖蘆鴈屏

何事高堂秋思生野蘆寒鴈畫工精風前舞並孤根老
雲外相從去意輕不似丹青能借色若逢霜月定聞聲
研桑心術都無取回望江鄉計未成

石倉歷代詩選卷一百四十七